

SIKUKI Nuuk Harbour A/S aamma Nuummi umiarsualiviliornissaq pillugu Inatsisartut inatsisissaattut siunnersuut.

(Naalakkersuisut Siulittaasuat, Aleqa Hammond, Siumut)

Saqqummiussissut

(Naalakkersuisut Siulittaasuat, Aleqa Hammond, Siumut)

Siullermeerneqarnera

Nuummi umiarsualiviup allilerneqarnerani sanaartornermut immikkoortup aningaasalersuinerullu naapertuunnerusumik aaqqissuunneqarnissaa siunertaralugu, Nuup umiarsualiviata sananeqarnissaanik ingerlanneqarnissaalu siunertaralugu aktiaatileqatigiiffimmik pilersitsinissaq pillugu UKA2013-imi Inatsisartut aalajangiiffigisassaata aalajangiiffigineqarpoq. Taamaattumik aktiaatileqatigiiffik SIKUKI Nuuk Harbour A/S 2013-imi decembarimi pilersinneqarpoq.

Naalakkersuisut kingusinnerpaamik UPA2014-imi pilersitsinissamut sanaartornissamullu inatsimmik, ingerlatseqatigiiffiup siunertaanik aalajangersaaffiusumik saqqummiussinissamut UKA2013/18-p ataani peqquneqarpoq. Isumalluutitigut peqquteqartumik UPA2014-imi inatsisissatut siunnersuummik saqqummiussinissaq ajornarsimammat Naalakkersuisut ajuusaarutigaat. Taamaattumik inatsisissatut siunnersuummik saqqummiussineq UKA2014-imi pivoq. Saqqummiussinerup aatsaat UKA2014-imi pinerata sunnuteqarnissaa naatsorsuutigineqanngilaq.

SIKUKI Nuuk Harbour A/S aktiaatileqatigiiffittut 100 mio. koruunit tikillugit aktiaatinik aningaasaateqartillugu pilersinneqarpoq. Aktiaatinik aningaasaatit aningaasaliinerit pisussat Nuummi umiarsualivimmi nutaami aningaasaliissutigineqartussat siunertaralugit aalajangerneqarput, taamaalilluni taakkua akiitsoriligassanut naatsorsuutigineqartunut naleqquttumik naapertuullutik.

Ingerlatseqatigiiffiup siunertaa inatsimmi nassuiarneqarpoq, tassaasoq Nuummi umiarsualivimmik containerersorfiusumik nutaamik pilersaarusiornissaq, neqeroortitsinissaq aamma sanaartornissaq kiisalu Nuummi umiarsualivimmik pioreersumik aammalu nutaamik ingerlatsinissaq. Nuummi umiarsualivik allilerneqaruni umiarsuarnik anginerusunik sullissisinnaanissamut inissaqartitsiviulissaaq, aammalu nunarput tamakkerlugu

umiarsualivittut pingaarnertut atuutissalluni. Tamanna nunarput tamakkerlugu sunniuteqarluartumik sullissinissamut periarfissaqartitsilissaaq, tassami nunatsinnut nassiussat umiarsuarni anginerusuni, sukkanerusumik aammalu nalinginnaanerusumik kiisalu avatangiisinik mingutsitsinngitsumik assartorneqarsinnaalissapput. Nassiussat Nuummi umiarsuarnut umiarsualivinnut minnerusunut talinnissamut immikkut sananeqarsimasunut usilersuuteqqinneqarsinnaassapput. Taamaalilluni Nuummi umiarsualiviup nutaap pilersinneqarnera, Kalaallit Nunaannut, Kalaallit Nunaannit aamma Kalaallit Nunaata iluani usinik imaatigut angallassinerep, ingerlasussanik piareersaanerup aamma suliarinninnerup pitsanngorsaavigineqarnerata ilaatut pissaaq. Aaqqiissutissaq illoqarfinnik nunaqarfinnillu usinik nassiussanik pilersuinermi malugineqarsinnaassasoq naatsorsuutigineqarpoq.

Inatsimmi naatsorsuutigineqarpoq ingerlatseqatigiiffik ingerlatsinermini niuerneramik tunngaveqartumik ingerlassasoq, taamaalillunilu siunertaanngilaq ingerlatseqatigiiffik sapinngisamik annertunerpaamik piginnittumut sinneqartooruteqartitsisassasoq. Kisiannili naatsorsuutigineqarpoq ingerlatseqatigiiffik aningasartuutinik atorluaalluni ingerlanneqassasoq aammalu aningaasartuutit ineriartornerat ingerlaavartumik nalilersorneqartassasoq, taamaalilluni ingerlatseqatigiiffik patajaallisassalluni aammalu siunissami umiarsualivimmik ingerlatsinermini pitsaasumik patajaatsumillu tunngavissaqalissalluni.

Taamatut oqaaseqarlunga saqqummiussissut Inatsisartuni kajumissaarnartumik suliarineqarnissaanut tunniuppara.